

夢占類考卷三


飛鳥部

鳥 一鳥文彩異常

晉羅含幼孤為叔母朱氏所養嘗晝臥夢一鳥文彩異常飛入口中因驚起說之朱氏曰鳥有文彩汝後必有文章自此後藻思日新仕為江夏從事太守謝尚曰可謂湘中之琳瑯後補桓溫參軍或謂含荆楚之才溫曰此自江左之秀豈惟荆楚而已

紫色大鳥

長洲張鳳翼伯起編



張鷟字文成爲兒童時夢紫色大鳥五彩成文降於庭其祖謂之曰五色赤文鳳也紫文鸞鷟也爲鳳之佐吾兒當以文章瑞於明庭因以爲名字初登進士第對策尤工又應下筆成章及才高位下詞標文苑等科鷟凡應八舉皆登甲科員外郎員半千謂人曰張子之文如青錢萬簡選中未聞退時時流重之目爲青錢學士天下之人無賢不肖皆記誦其文天后朝中使馬仙童陷默啜默啜謂仙童曰張文成在否曰近自御史貶官默啜曰國有此人而不用漢無能爲也新羅日本東夷諸蕃尤重其文每遣使入朝必重出金貝以購其文其才名遠播如此

大鳥止所居

蕭克翁隱居不仕學行爲州里所推嘗夢大鳥止其所居翼覆軒外舉家驚異出戶視之冲天而去明日魯思溫自順陽來從學克翁爲易其名曰翀而字之曰子翬子翬竟以文學政事知名官至翰林侍講學士贈行省叅知政事封郡公謚文靖

元史

白鳥墜雲

贊皇尉張師夢白鳥飛翔墜於雲際旣覺心神恍惚召董賀卜之賀卽決卦慘然而問曰朝來寢息不有夢乎必若有夢其飛禽之象乎且雷震山上鳥墜雲間聲跡兩消不

可復見樂天委命而已師是年七十一竟不起

鳳吐鳳

揚雄作甘泉賦成夢口吐白鳳

鳳集手上

大業中有孫姓者夢鳳鳥集手上以為善徵以問蕭吉吉曰不祥孫以為妄後十餘日遭母喪乃遣所親往問吉吉云鳳鳥非梧桐不棲非竹實不食所以止君手上者手中有桐竹之象也禮云苴杖竹也削杖桐也是以知必有重

憂耳

大業拾遺記其集異記所載以占夢者為宋董稍異

金鳳銜珠

詳珍寶部許遜

靈鳳集身

詳黃冠部王遠知

五色雲化鳳

詳天象部徐陵母

鸞鳥入室

黃梅尉聶新妻陳夢鸞鳥入室旦而育女後歸黃簡肅公

封夫人享年七十有二

升菴文集

鶴九鶴自天而下

張九齡母夢九鶴自天而下飛集於庭遂生九齡為唐賢

飛鳥

相唐書

駕鶴冲天

李抱真以司空平章事居重鎮晚節好方士有孫季長者為抱真鍊金丹抱真夢駕鶴冲天寤而刻木鶴衣道士衣以習乘之凡服丹二萬丸腹堅不食將死道士牛洞玄以猪肪穀漆下之殆盡病少間季長復曰垂上仙何自棄也益服三千丸而化去

飛鳴過我

蘇子與客遊於赤壁之下反而登舟放乎中流時夜將半四顧寂寥適有孤鶴橫江東來翅如車輪玄裳縞衣戛然

長鳴掠予舟而西也須臾客去予亦就睡夢一道士羽衣蹁躑過臨臯之下揖予而言曰赤壁之遊樂乎問其姓名俛而不荅嗚呼噫嘻我知之矣疇昔之夜飛鳴而過我者非子也耶道士顧笑予亦驚悟開戶視之不見其處

黃鶴從天飛來

顧文康鼎臣生時父年已五十文康既壯每夜焚香祈父壽願以已壽益親令見已成立以伸孝養一夕夢黃鶴從天飛來近視之即所焚表也後一大院宇未有硃批數行云自此以後如田單火牛通行無滯蓋乙丑之兆也父享年八十餘及見文康及第云

狀元錄

旌旗鶴鴈降庭

詳旂常部富弼

鸚鵡鸚鵡兩翅俱折

唐則天后夢一鸚鵡羽毛甚偉兩翅俱折以問宰相內史狄仁傑曰鸚鵡者陛下姓也兩翅折者陛下二子廬陵相王也陛下起此二子兩翅全矣武承嗣武三思面項皆赤後契丹圍幽州檄朝廷曰還我廬陵相王來則天乃憶狄公之言曰卿曾為我占夢今乃應矣朕欲立太子何者為得傑曰陛下內有賢子外有賢姪取舍詳擇斷在聖衷則天曰我自有聖子承嗣三思是何疥癬承嗣等懼掩耳而走

即降勅追廬陵立為太子充元帥初募兵無有應者聞太子行北邙山頭皆兵滿無容人處賊自退散

唐史

鳥鳥集啓上

宋景公無子取公孫周之子得與啓畜諸公宮未有立焉於是六卿三族降聽政因大尹以達大尹常不告而以其欲稱君命以令國人惡之冬十月公游於空澤辛巳卒於連中大尹興空澤之士千甲以公命召六子至以甲劫之盟曰無為公室不利大尹立啓奉喪殯于大宮三日而後國人知之得夢啓北首而寢於廬門之外已為鳥而集於其上味加於南門尾加於桐門曰余夢美必立大尹謀曰

我不在盟無乃逐我復盟之乎使祝爲載書六子在唐孟將盟之皇氏戴氏皆歸授甲使狗于國曰大尹惑蠱其君以陵虐公室與我者救君者也衆曰與之大尹奉啓以奔楚乃立得左傳

赤烏若龍戲

豐公家于沛之豐邑中陽里其妻夢赤烏若龍戲已而生

執嘉是爲太上皇

帝王世紀

烏鵲群集其下

信州刺史蕭遇少孤將改葬母于舊塋至攢處悞啓他墓既而知其非號慟而歸夜忽夢戶外有聲呼遇小名曰吾

是爾毋遇驚走出戶拜迎見其母毋從暗中出遇與相見如平生謂遇曰汝至孝動天神祇降鑒令我與汝相見遇乃迷迷悞塋域之恨毋曰吾來亦爲此吾墓上已有李五娘墓且已平坦何可辨也汝明日但見烏鵲羣集其下是已遇聞言卽驚寤哀號待曉至其處果見有烏鵲集平地乃掘之得李五娘墓更於下得毋墓方扶歸葬云通幽記

燕

玉燕投懷

張說毋夢玉燕投懷遂生說爲唐名相封燕公

定命錄

鴛鴦

兩瓦化爲鴛鴦

詳棟宇部魏文帝

飛鳥

鷄 鷄化為鷄

西施母有娠夢五色鷄自天而下化為鷄飛去遂產女是為西施

白鷄

詳什百部謝安白鷄主酉太歲在酉病不起也

鷓鴣 小罪受鷓鴣身

詳輪迴部石壁寺老僧

走獸部

獸 猛獸超叢棘

北齊馬敬德中第後其妻夢猛獸將來向之敬德走超叢

棘妻伏地不敢動敬德占之曰吾當得大官超棘過九卿

也爾伏地夫人也已而世祖為後主擇師趙彥深進之入

為侍講武平初以師傅恩超拜國子祭酒加儀同三司金

紫光祿大夫領瀛州大中正後封廣漢郡王

北史

牽五色獸逼衣

五代王宗俛妻有娠夢周公山神牽五色獸逼其衣遂生

承肇承肇稍長有異僧見而撫之曰老僧所居周公山佳

氣減半乃孕靈此子耶後節制揚州入洛為行軍司馬

雅

州志

猛獸斷盤囊

走獸

詳地理部鄧殷

麟 麟入室

長興顧母楊氏有娠夢麟入室寤而生子遂名應祥後舉進士敷歷有聲官至南京刑部尚書贈太子少保

弁州集

騶虞 騶虞

尚書劉公麟夢騶虞而得曾孫符卿陸公師道作歌云君不見煌煌丹穴五色雛渥注之產汗血駒鳳毛龍子自有種隨地便與凡禽殊劉宗積德天下無尚書聲光照寰區公侯子孫必復始感應吉夢來騶虞白質黑章照山水鬱鬱紫氣佳城隅笑喚吾家雪色狸心知非熊亦非羆詰朝

冢孫舍懸弧始信占夢言非誣錦祿見公顏玉立耽耽雄視回清矚吾聞庭堅作理祀英六始生白虎開貞符騶虞之祥亦此類行繩祖武陳臯謨何須更試啼聲爽但請徵

之白澤圖 陸符卿集

獅 五色獅子

王敬則母為女巫常謂人曰敬則生時胞衣紫色應得鳴鼓角人笑曰汝子得為人吹角可矣及長夢騎五色獅子後果如母所料云

南史

虎 白虎

堯為天子季秋下旬夢白虎遺吾馬啄子其母曰扶始升

走獸

高丘睹白虎上有雲感已生臯陶索扶始問之如堯言明
於刑法罪次終始故立臯陶為大理

春秋元命苞

白虎齧左驂馬

二世三年自關以東大氏盡畔沛公將數萬人已屠武關
趙高恐二世怒誅及其身乃謝病不朝見二世夢白虎齧
其左驂馬殺之心不樂怪問占夢卜曰涇水為祟二世乃
齋於望夷宮欲祠涇沈四白馬使使責讓高以盜賊事高
懼乃詐為有大賊使其弟郎中令趙成為內應遣其壻咸
陽令閻樂將吏卒千餘人至望夷宮殿門縛衛令僕射曰
賊入此何不止遂斬衛令直將吏入行射郎宦者大驚或

走或格格者輒死死死者數十人郎中令與樂俱入射上幄
坐幃二世怒召左右左右皆惶擾不鬪閻樂前即二世數
曰足下驕恣誅殺無道天下共畔足下足下其自為計二
世自殺

史記

虎啣雷公

曹爽夢二虎啣雷公雷公若二升椀放著庭中爽惡之以
問占者靈臺丞馬訓訓曰憂兵訓退告其妻曰爽將以兵
亡不出旬日已而果為司馬懿所害

世說

虎嚙傷死

唐晉陽縣有人殺其妾妾將死言曰吾無罪為汝所殺必

走獸

報後數年殺妾者夜半起至毋寢呼其毋毋問故其人曰
適夢爲虎所齧傷甚遂死覺而心驚悸甚故特啓之毋曰
人言夢死者反生夢想顛倒故也汝何憂然汝夜來未飯
牛亟飯之乃往飯牛閭中見物似牛之脫乃前執之不知
其虎也遂爲所噬其人號叫竟死時人以虎爲所殺之妾
也紀聞

虎行月中

宋滕元發毋夢虎行月中墮其室遂生元發舉進士授大
理評事召試爲集賢校理以直道策名於英神哲三朝

虎頭洲

宋治平中士子李權夢人張樂送之於虎頭洲上俄而登
科蓋虎頭虎榜頭也

囚化爲虎

洪起畏爲浙西提刑夜夢錄囚十八人內一人化爲虎寤
而異之明日見所解賊徒數與夢合而張瑄在其中洪奇
其狀特貸其死未幾宋亡而瑄以漕運貴顯乃給洪終身
以報全護之恩

身化爲虎

鄴中楊真者癖好畫虎畫則每坐臥必觀之旣老臥疾召
兒孫謂之曰我平生不合癖好畫虎每夢中多與群虎游

至晚年尤甚我方恐懼今又夢身化為虎覺既久而方復
人身我死之後恐必化為虎兒孫輩遇虎慎勿殺之其夕
卒家方謀葬其尸忽化為虎跳躍而出其一子逐出觀之
虎回食其子而去數日忽家人夜夢真歸謂家人曰我已
為虎甚是安健但離家時便得一人食之至今猶不飢
而為虎所逼

詳人身部李士寧

黃冠以袖障虎

詳帷服部蘇長公賦

象
大象

會稽張茂嘗夢大象以問萬推曰君當為大郡而不能善
夫象者大獸取其音獸者守也象以齒焚其身後必為人
所殺至永昌中為吳興太守值王敦問鼎茂執正不移敦
遣沈充殺之異苑

金象飛越

呂光攻龜茲城夜夢金象飛越城外光曰此謂佛神去之
胡必亡矣已而果平龜茲史

白象

金齒人周玉為人醇朴至老不識衡量嘗夢白象詰旦而
生子奕中嘉靖戊子鄉試知灌縣縣瘠土又當咸茂二邊

走獸

餉道奕食不兼味以廉靖聞 滄溟集

熊羆 熊羆虺蛇

下莞上簟乃安斯寢乃寢乃興乃占我夢吉夢維何維熊

維羆維虺維蛇大人占之維熊維羆男子之祥維虺維蛇

女子之祥 詩經小雅斯干之六七章言夢熊羆則生男夢虺蛇則生女

黃熊入寢門

鄭子產聘於晉晉侯有疾韓宣子逆客私焉曰寡君寢疾於今三月矣並走群望有加而無瘳今夢黃熊入於寢門其何厲鬼也對曰以君之明子為大政其何厲之有昔堯殛鯀於羽山其神化為黃熊以入於羽淵實為夏郊三代

祀之晉為盟主其或者未之祀也乎韓子祀夏郊晉侯有間賜子產莒之二方鼎 左傳

熊羆羆犬

趙簡子疾五日不知人大夫皆懼醫扁鵲視之出董安于問扁鵲曰血脉治也而何怪在昔秦穆公嘗如此七日而寤寤之日告公孫支與子輿曰我之帝所甚樂吾所以久者適有學也帝告我晉國將大亂五世不安其後將霸未老而死霸者之子且令而國男女無別公孫支書而藏之秦讖於是出矣獻公之亂文公之霸而襄公敗秦師於殽而歸縱淫此子之所聞今主君之疾與之同不出三日疾

必間間必有言也居二日半簡子寤語大夫曰我之帝所甚樂與百神游於鈞天廣樂九奏萬舞不類三代之樂其聲動人心有一熊欲來援我帝命我射之中熊熊死又有一羆來我又射之中羆羆死帝甚喜賜我二笥皆有副吾見兒在帝側帝屬我一翟犬曰及而子之壯也以賜之帝告我晉國且世衰七世而亡羸姓將大敗周人於范魁之西而亦不能有也羸趙姓也周人謂衛也晉亡之後趙取衛地今余思虞舜之勳適余將以其胄女孟姚配而七世之孫董安于受言而書藏之以扁鵲言告簡子簡子賜扁鵲田四萬畝他日簡子出有人當道辟之不去從者以聞簡子召之曰噫吾有

所見子晰也

是前夢所見者知其名曰子晰也

當道者主君之疾臣在帝

側簡子曰然有之子之見我我何為當道者曰帝令主君

滅二卿夫熊與羆皆其祖也

范氏中行氏之子也

簡子曰帝賜我二

笥皆有副何也

副謂皆子姓也

當道者曰主君之子將克二國於

翟皆子姓也

謂代及智是也

簡子曰吾見兒在帝側帝屬我一翟

犬曰及而子之長以賜之夫兒何謂以賜翟犬當道者曰兒主道之子也翟犬者代之先也主君之子且必有代及主君之後嗣且有革政而胡服并二國於翟簡子問其姓而延之以官當道者曰臣野人致帝命耳遂不見後二年中行文子范昭子作亂簡子逐范中行而竟有邯鄲栢人

之地奉邑侔於諸侯矣簡子卒襄子立遂并代地而滅智伯至武靈王胡服騎射而趙益强大史記

大羆

苻健母羗氏夢大羆而孕遂生健及長勇果便弓馬好施善事人後襲父洪位遂稱帝北史

鹿

蕉鹿

鄭人有薪於野者遇駭鹿擊而斃之恐人見之也遽而藏諸隍主覆之以蕉不勝其喜俄而遺其所藏之處遂以為夢焉順途而詠其事傍人有聞者用其言而取之既歸告其室人曰向薪者夢得鹿而不知其處吾今得之彼直真

夢者矣室人曰若將是夢見薪者而得鹿耶詎有薪者耶今其得鹿是若之夢真耶夫曰吾據得鹿何用知實夢我妻耶其妻又疑其為夢薪者歸復其真夢藏之之處又夢得之之主案所夢而尋得之遂訟而爭之歸之士師士師欲二分之一以聞鄭君皆互有夢覺之說相國曰欲辨夢覺惟黃帝孔丘列子

沙上群鹿渡水

唐賊將史思明僭稱大號在永寧時以泥城未畢怒其孽子朝義云待收屯州斬却此賊朝義大懼乃與其將駱悅謀圖思明一夕思明夢而驚悟據牀惆悵左右問其故曰

吾夢見水中沙上群鹿渡水而至鹿死水乾言畢如廁其
伶人相謂曰鹿者祿也水者命也胡祿命盡矣已而駱悅
入問思明所在衆指在廁思明覺變踰垣入廐取騎出奔
悅令周子俊射中其臂落馬擒赴柳泉驛縊殺之

唐史

岐角鹿負圖籍

正德乙亥重九太倉王翁湧夢一岐角鹿負圖籍而入室
是夕得子遂名之曰夢祥字之曰奇徵以志夢也身雖未
踰素封而生二丈夫子以文章氣節陟尊顯累封至詹事
學士云

行狀

二鹿大小不倫

甲子秋予兄弟應試南都予夢二鹿馴擾於庭但大小不
倫放榜後予與季弟燕翼與焉說者以為鹿宴鹿鳴也大
小不倫季弟時方弱冠與予年齒不倫也後季弟不幸短
命然則鹿之小者抑豈其祿命之不永耶

得鹿皮十一領

詳什百部梁吉王瞻

猿

猿墮前

張氏羅江士人女其母楊氏寡居一日親黨有婚會母女
偕往其典庫雍乙者從行既就坐乙先歸會罷則乙死庫
提點刑獄張文饒疑楊有私殺乙以滅口遂命劾治并逮

其女考掠無實毋絕而復甦者屢辭終不服一日女謂獄吏曰我不勝笞毒將死矣願一見毋吏憐而許之謂毋曰毋寧死箠楚不可自誣女今死將訟寃於天言終而絕於是連三日地大震聲如雷天雨雪屋瓦皆落邦人震恐勘官李志寧疑其獄夕禱於天俄假寐廳事恍夢猿墮前驚悟索之不見志寧自念非殺人者袁姓乎門卒忽言張氏饋食之夫曰袁大明日袁至執之袁遽曰願就死問之云適盜庫金會乙歸遂殺之楊乃得免時女死纔數日獄上郡榜所居曰孝感坊

宋史

猴
車中猴

尼妙寂初嫁大賈任華其父升與華往長沙寂忽夢父泣謂曰吾與汝夫湖中遇盜殺我者車中猴東門草夢其夫曰殺我者禾中走一日夫有李公能辨隱語謂曰殺汝父者申蘭殺汝夫者申春耳猴申生也車去兩頭為申字門東草為蘭字禾中走者穿田也亦申字一日加夫為春字妙寂乃易男服泛江湖間有申村村中有申蘭兄弟因徃求傭餘年無知其非丈夫者二盜飲醉妙寂奔告有司而獲之詞伏就法乃復從釋教云

史

神責殺猴

南野人伍寺之見社樹上有猴懷孕便登樹擺殺之夢一

走獸

卷之三

人稱神責以殺猴之罪當令重謫不半年寺之病作醫不能療遂卒 述異記

狼 狼啖一脚

詳人身部張邈

狸 狸無首

魯子夢狸無首作殘形操 韓子

馬 三馬同食一槽

曹操聞司馬懿有狼顧相又嘗夢三馬同食一槽甚惡焉

因謂不曰司馬懿非人臣也必預汝家事後與師昭相次

當國竟遷魏鼎云 魏史

河神請馬

晉明帝時獻馬者夢河神請之及至與帝夢同即投河以奉神始太傅褚裒亦好此馬帝云已與河神及裒卒軍人見裒乘此馬 孔約志怪

乘馬飛半天而墜

崔慧景之逼長沙宣武王入援至越城夢乘馬飛半天而墜而梁武所馭化為赤龍騰虛獨上 梁書

舍中馬舞

黃平夢舍中馬舞數十人向馬拍手問索統統曰馬者火也舞為火起向馬拍手救火人也平未歸而火作 史

走獸

馬停水中

苻融為司隸校尉時有京兆人董豐游學三年而返過宿妻家是夜妻為賊所殺妻兄疑豐殺之送豐有司豐不堪楚掠誣引殺妻融察而異之問曰汝行往還類有怪異及卜筮否豐曰初將發夜夢乘馬南渡水反而北渡復自北而南馬停水中鞭策不去俯而視之見兩日在水下馬左白而濕右黑而燥寤而心悸竊以為不祥還之夜復夢如初問之筮者筮者云憂獄訟遠三枕避三沐既至妻為具沐夜授豐枕豐記筮者之言皆不從妻乃自沐枕枕而寢融曰吾知之矣周易坎為水馬為離夢乘馬南渡旋北而

南者從坎之離三爻同變變而成離離為中女坎為中男兩日二夫之象坎為執法吏吏詰其夫婦人被流血而死坎二陰一陽離二陽一陰相乘易位離下坎上既濟文王遇之囚羸里有禮而生無禮而死馬左而濕濕水也左水右馬馮字也兩日昌字也其馮昌殺之乎於是推檢獲昌而詰之昌具首服曰本與其妻謀殺董豐期以新沐枕枕為驗是以誤中婦人也

北史

駿馬

傳融性豪俠有三子靈慶靈根靈越並有才力融以自負謂足為一時之雄嘗謂人曰吾昨夜夢有一駿馬無堪乘

者有一人曰惟傳靈慶堪乘此馬又有弓一張亦無人堪
引入曰惟有傳靈根可彎此弓又有數帙文書人皆讀不
能解人曰惟傳靈越能解此文後靈慶為蕭斌所殺靈根
靈越奔河北靈越為青州刺史具丘子靈根為臨齊副將
鎮明潛壘復欲南奔為臨齊人所殺靈越以從于勛舉兵
為宋明帝所殺

北史

使君遣我牧馬

襄陽蘇嶺山廟門有二石鹿夾之故謂之鹿門山習氏記
云習郁當為侍中從光武幸黎丘郁與光武俱夢見蘇嶺
山神因使立祠郭重產記云雙石鹿自立如鬪採伐人常

過其下或有時不見鹿因是知有靈瑞梁天監初有蠡湖
村人於此澤間獵見二鹿極大有異於恒鹿乃走馬逐之
鹿即透澗直向蘇嶺人逐鹿至神所遂失所在唯見廟前
二石鹿獵者疑是向者鹿所化遂回其夜夢見一人著單
巾幘黃布袴褶語云使君遣我牧馬汝何驅迫賴得無他
若見損傷豈得全濟

襄陽記

乘白馬入梨山

建州梨山廟土人云故相李回之廟回貶為建州刺史後
卒于臨川卒之夕建安人咸夢回乘白馬入梨山及凶問
至因立祠焉世傳靈應

當斷馬足

牽騰以咸和三年為沛郡太守出行不節夢烏衣人告云何數出不輟唯當斷馬足騰後出行馬足自斷

幽明錄

洗白馬

威遠軍小將梅伯成善占夢有優人李伯憐遊涇州乞錢得米百斛及歸令弟取之過期不至夜夢洗白馬訪伯成占之伯成杼思曰凡鄆人好反語洗白馬濕白米也君所憂或有風水之虞乎數日弟至果曾於渭河中覆舟

馬無前足

王蜀時有朱姓者貧賤客于成都因寢旅舍夢中有人扣

扉覓朱少卿其聲甚厲驚覺訪之寂無影響復睡夢中又連呼之俄見一人手中執一卷云少卿果在此朱曰吾雖姓朱非少卿其人遂卷文書兩頭只留一行以手遮上下示之果有朱少卿三字續有一人自外牽馬一疋直入云少卿領取朱視之其馬無前足步步側蹶匍匐而來其狀苦楚朱大驚而覺常自惡之後蜀王開國有親知引薦累至司農少卿無何膝上患瘡雙足自膝下俱落痛苦經旬而死夢乃驗

王氏見聞

馬缺一耳

丁元珍嘗夜夢與歐陽修至一廟出門見馬缺一耳後元

珍除峽州修除夷陵令一日同祠沂謁黃牛廟入門惘然
皆如夢中所見門外石馬缺一耳相視大驚以為事有前
定如此云 宋史

馬乘一兒

元劉述四十未有子嘆曰天果使我無子則已有則必令
讀書一夕夢神人以馬乘一兒送至其家曰善養之既而
得子名之曰駟字夢驥後改名因字夢吉三歲日記千言
七歲後屬文兩膺聘命遂為名儒云 元史

龍子立階下

何學憲景明得一馬齒小而良丁卯歲季夏十五夜何忽

夢一龍子立階下跼蹐而死夢警僅在外呼曰廐馬死廐
馬死何怪而惜之作悼馬詩十韻云乘爾方踰歲何期病
忽危四蹄猶未繫雙淚泫長垂渥水千年降房星一夜墮
早逢田子嘆終遣塞翁悲顧影辭金絡遺骸戀敝幃詎能
酬飼秣那復効驅馳首霜殘空櫪蕪苔滿故池風塵思駿
力烟海失龍姿惆悵玄黃句淒涼赭白詞平生精志在不
媿主人知 何氏集

騎馬上天門

太宗伯秦公鳴雷夢騎馬飛上天門無何及第 狀元錄

走馬上山

詳地理部敦煌郡主簿

馬奪其首

詳文翰部馬鐸

皎皎白駒

詳文翰部杜牧

驢一人乘黑驢

秦苻生每宴集後入者皆斬之尚書郎杜慈奔馳疲倦假

寢省中夢一人乘黑驢曰寧留而同死將去而獨生慈聞

驚覺取馬遁走乃免餘皆斬廣古今五行記

着緋乘驢

張鸞初為岐王屬夜夢着緋乘驢夢中自怪我衣綠乘馬
何為衣緋却乘驢其年應舉及第授鴻臚丞未經考而授
五品此夢始應朝野僉載

乘驢渡水

衛中行為中書舍人時有故舊子弟赴選投衛論囑衛欣
然許之駁榜將出其人忽夢乘驢渡水蹶墜水中登岸而
靴不沾濕訪之秘書郎韓眾眾被酒戲曰公今年選事不
諧矣據夢衛生相負足下不沾及榜出果然酉陽雜俎

牛牛頭流血

蔣琬見推之後夜夢有一牛頭在門前流血滂沱意甚惡

走獸

之呼問占夢趙直直曰夫見血者事分明也牛角及鼻公
字之象君位必當至公大吉之徵也後果驗云蜀志

白牛跛脚

唐盧叔敏崔祐甫之表姪也祐甫初拜相有書與盧令應
明經舉盧遂赴京行李貧困有驢兩頭一奴纔十餘歲初
發縣有一紫衣人與盧同行云送書狀辭氣甚謹盧以僮
僕小甚利其作伴扶接鞍乘每到店必分以茶酒至鄂嶺
早發十餘里天纔明紫衣人與小奴驅驢在後忽聞奴叫
呼聲云被紫衣人毆擊盧曰奴有過但言何得便自打也言
訖見紫衣人懷中抽刀刺奴洞腸流血生乃驚走馳數十

步紫衣遂及以刀刺倒與奴同死時緱氏尉鄭楚相與盧
中外兄弟晨起於廳中忽困睡夢盧被髮血汚面目手牽
一白牛謂尉言已被賊殺狀云賊今未可得兄但記明年
八月一日平明賊從河中府與同黨買牛來於此過牽此
牛跛左脚入西郭門最後驅者即是鄭驚覺遂言於同僚
至明年七月末鄭與縣宰計議五更潛布弓矢手力於西
郭門外鄭亦自往伏於路側至日初出果有人驅牛自西
來者後白牛跛左脚行遲不及其隊有一人驅之其牛乃
鄭夢中所見盧生牽者遂擒掩之并同黨六七人盡得驅
跛牛者乃殺盧賊也問之悉伏

逸史

北山下爲牛

唐灞渭間有婦謝氏女適來阿照謝氏亡託夢于來氏女曰我生時酤酒取價太多量酒復少今坐此罪於北山下人家爲牛近被賣與法界寺夏侯師今將我向城南耕稻田非常辛苦及寤其女涕泣爲阿照言之卽就寺訪之云近於北山下買得一牛見在城南耕地其女涕泣求請夏侯乃遣人送其女就之此牛平常唯一人禁制若遇餘人必陸梁舐觸見其女至乃舐其遍體又流淚焉女卽是就夏侯贖之牛乃隨女去在阿照家養飼女常呼爲阿娘承奉不闕

冥報記

暫假爾牛

隴州吳山縣人一夕皆夢有人乘白馬語曰我欲移居暫假爾牛言訖卽過及明數百家牛皆被體汗流如水是日縣南山曲出一湫方圓百餘步里人以此湫因牛而遷謂之特牛湫

獨異志

牛兩尾

洛州杜玄有牛一頭玄甚憐之夜夢見其牛有兩尾以問占者李仙藥仙藥曰牛字有兩尾失字也經數日果失之

朝野僉載

牽牛陷澤中

走獸

湯御史鵬在弘治初年以敢言自負為大臣劉吉所嫉吉
啗御史魏璋以刺史伺鵬鵬家壽州其知州劉槩與書言
嘗夢一人牽牛陷澤中鵬手提牛角引之而上蓋以人牽
牛象國姓下澤危兆引之而上賴龜安之也鵬出書示客
璋遂以此劾之鵬下獄

白色土牛

王宗伯華於成化甲午下第歸甯方伯竑聘為其子講學
乃自浙抵祁陽居於梅庄書屋明年己未謝學士遷狀元
及第甯賀曰先生與謝公齊名今謝公及第此彙征之兆
也是夜夢歸鄉邑如童稚時逐衆迎春東郭門外衆舁白

色土牛一覆以赭蓋旌纛幡節鼓吹前導杜方伯其肩輿
隨於後自東門入至乃止既寤未解其兆明日以語甯甯
不應久之屈指作迴輪者再作而曰是狀元之兆也牛一
元大武也春歲之首而試之期也狀元亦謂春元也金色
白其神為辛牛之神丑也中之歲其以辛丑乎王曰鼓吹
前導者何曰是所謂傘蓋儀從送歸第者也曰奚為而杜
乃隨之曰以傘蓋從者實京兆尹是歲京兆尹其必杜乎
王聞而歎之曰子之言殆隍中之鹿也甯私志之歲丁酉
王復下第奔走江湖夢之真妄不復記憶庚子乃領薦鄉
闈明年辛丑試春官得雋入奉臨軒之對果得狀元及第

傳臚畢承制送歸長安私第者果杜也悉如甯之所解云

王宗伯自作記

牛首

丁丑歲殿撰沈公懋學以舉子入試禮闈場事畢夢衆人扛一牛至其寓沈怒仗劍出斬牛牛首墮其前衆兢持牛體出放榜後向予言之予時下第將南下謂沈曰卿此試幸不作會元將於廷試驗之矣丑牛也首元也衆分其體而卿得其首非元乎已而廷試果第其狀元之狀元

如田單火牛

詳飛鳥部顧文康

羊 群羊負魚

趙主石季龍嘗晝寢夢見群羊負魚從東北來寤以訪佛圖澄澄曰不祥也鮮卑其中有中原乎蓋以羊與魚為鮮字也後果為慕容儁所殺 北史

山上盡目皆羊

唐李德裕為太子少保分司東都嘗召一僧問已休咎僧云公災當萬里南去曰南去遂不還乎僧曰當還耳公訊其事對曰相國平生當食萬羊今食九千五百矣所以當還者未盡五百羊耳公慘然而嘆曰吾師果至人且我元和十三年為丞相張公從事嘗夢行晉山見山上盡目皆

羊有牧羊者十數迎拜我我因問牧者牧者曰此侍御平生所食羊吾嘗識此夢不洩於人今者果如師之說耶後旬日振武節度使米暨遣使饋金一封上書准四百羊公大驚即召告其事僧嘆曰萬羊將滿公其不還公曰吾不受亦可免耶曰羊至此已為相公所有公戚然不悅旬日貶潮州司馬連貶崔州司戶竟沒於荒裔 太平廣記

羊并二羔

火井李明府偶宿錄事私第夢素衣婦人引二子來乞命李不解已而復夢婦人自言為錄事妻前身因妬繆以盜釵殺其懷胎婢胎有二子今我化作羊并二羔受殺已償

寃債訖釵見在堂西拱料內煩告主人以取釵為驗勿食羊肉李驚起召問主人則一羊二羔已剖具為說夢覓釵遂埋此羊相與歎異 報應錄

青羊白頭

唐韋慶植有女先亡韋夫婦痛惜之後二年韋將讌客家人買得羊韋妻夢見亡女着青練裙白衫頭髮上有一雙玉釵是平生所服者來見母涕泣言昔常用物不語父母坐此業報今受羊身來償父母明日當見殺青羊白頭者是特願慈恩垂乞性命母驚寤旦自往觀果有青羊項膊皆白頭側有兩條白如玉釵形母悲泣止家人勿殺待韋

至放釋之俄而韋至催食宰夫白云夫人不許殺青羊韋怒卽令殺之宰夫懸羊欲殺客數人已至恍惚見懸一女子容貌端正客等驚愕止宰夫宰夫懼韋怒遂殺之既而客坐不食羊韋怪問之客具言其故韋悲痛發病遂不起

法苑珠林

化羊爲典所殺

唐高宗時徐慶爲征遼判官在軍忽夢已化爲羊爲一典所殺覺後悸懼流汗至曉此典詣慶慶問夜來有所夢否典云夢公爲羊手加屠割意甚不願爲官所使制不自由慶自此不食羊肉至則天時慶累加至司農少卿雍州司

馬時典已任大理獄丞後慶被誣與內史令裴炎通謀應英公徐敬業被執送大理忽見此典押獄慶便流涕謂之曰征遼之夢今當應之及被殺戮之日竟是此典引出

古今五行記

盜羊入獄

許超夢盜羊入獄元稹解之當得城陽令後封陽城侯

陽雜俎

人擁一羊遺之

宋太祖六世孫秀王偁夫人張氏夢人擁一羊遺之已而有娠生伯琮于秀州及元懿太子薨高宗未有後昭慈聖

走獸

獻皇后語以異夢高宗曰太祖以神武定天下子孫不得享朕若不法仁宗為天下計何以慰在天之靈於是選育宮中後立為皇太子更名昚即帝位是為孝宗

宋史

羊踏菜園

有人常食菜忽食羊夢五臟神曰羊踏破菜園矣

韻府

羊頭

柯學士潛常夢禱九里廟與賓友讌會柯坐首席須臾宰夫以一羊頭獻於前寐而識之至辛未果中狀元符夢兆

云狀元錄

執弩驅羊

詳成器部黃帝

羊 犬羊各一在御座

太醫令朱耽嘗直禁省夜夢犬羊各一在御座覺而惡之告人曰犬羊者非佳物也今據御座將有變乎既而天子

蒙塵侯景登正殿焉

梁書

犬 兩黑犬嗥以南嗥以北

吳王夫差夢兩黑犬嗥以南嗥以北公孫聖曰黑者陰也

北者匿也詳地部

愚意犬吠非其主嗥以南者越將至也嗥以北者齊未服也

白犬自天而下

王敦舉兵犯順病作夢白犬自天而下嚙之覺後病轉劇

走獸

乃以身後囑錢鳳俄而敦死

晉書

綠色犬

張天錫在涼州夢一綠色犬甚長從南來欲昨天錫天錫在牀上避之乃墮地後苻堅遣苻萇著綠地錦袍從南來攻入門大破之

李產集異傳

二黑犬過堂下

宋徐元杰嘗夢神人繫二黑犬過堂下授之是歲登科之文有默思默通云者主司見之以為神語乃悟默字有黑犬重複用之二黑犬之徵也

赤犬化為龍

林環往九仙觀上兆路遇道士云為代占夢赤犬化為龍

明年應作狀元也乃詭說之詞及赴京適符給語

按此夢與芻狗

鴛鴦事同

犬肉一片

林環將試春闈夢其友李文淵送犬肉一片環嚙一臂受之迨揭榜環狀元及第蓋一片犬肉乃狀字嚙一臂類元字後官文淵閣學士始悟夢李文淵者乃先兆也

夢徵錄

犬肉一片置几上

葉祖洽赴省試夢邵武廣祐廟神將犬肉一片置几上命食之明年葉作大魁方悟一片犬肉置几上乃狀元二字

也 八閩志

竹片反押青犬頭

張諭德信舉鄉薦赴京夢以竹片反押青犬頭置兀上詳者曰竹片反押青犬乃狀字置兀上轉元字况當甲戌必魁天下果如所言 狀元錄

帝屬一翟犬

詳本部趙簡子

豕 勞我以豕

朔人獻燕昭王以大豕曰養奚若使曰是豕也非大豕不居非人便不珍今年百二十矣人謂豕仙王乃命豕宰養

之大如沙獮足如不勝其體甚巨無用燕相謂王曰奚不享之王乃命宰夫膳之夕見夢於燕相曰造化勞我以豕形食我以人穢吾患其生久矣仗君之靈得化吾生始得為魯津之伯欣君之惠將有報焉燕相遊乎魯津有赤龜奉壁而獻 符子

赤彘雲中下

漢景帝在東宮納王美人有娠景帝夢一赤彘從雲中下召占者姚翁問之翁曰吉祥也必主命世之人攘夷狄而獲嘉瑞為劉宗盛主也及生男因名彘焉是為武帝後改名徹 武帝內傳

豬啣足

漢前將軍關羽初出軍圍樊夢豬啣其足語子平曰今年衰矣然不得還果為吳人所襲蜀志

一豕不可得王美人言

齊趙隱字彥深為大行臺都官郎中從齊文襄征潁川時引水灌城城雉將沒魏將王思政猶欲死戰文襄令隱單身入城告喻即日降之便手牽思政出城文襄謂隱曰吾昨夜夢獵遇一群豕吾射盡獲之獨一大豕不可得卿言當為吾取須臾獲豕而進今夢驗矣北史

作猪償債

隋民皇甫遷不事生理母嘗取錢置牀上向舍後遷從外來不見人便偷錢去母還覓錢不得遂勘合家良賤悉加鞭笞至後年遷亡其家猪生一犢子賣與遠村社家遂託夢于婦曰我是汝夫為盜取婆錢枉及合家浪受楚拷今我作猪來償債將賣與社家縛我欲殺汝是我婦何忍不語男女贖我婦忽寤因起報姑姑曰吾夢亦如之遲明令兄齋錢詣社官收贖之弘法寺僧靜琳是遷鄰里親見其猪嘗話其事法苑珠林

母猪極大

饒陽李瞿曇勳官番滿選夜夢一母猪極大語李仙藥仙

藥占曰毋猪狗主也君必得屯主數日果如其言

大豕決都城

至正二十二年元順帝一夕夢大豕決都城而覆因禁軍民畜猪比天兵至柳林順帝召百官議戰守計忽有二狐自內殿出帝歎且泣即命開建德門北去明年高皇聞其駐應昌也馳書開示禍福順帝因荅詩云金陵使者渡江來漠漠風烟一道開旺氣有時還自息皇恩何處不昭回信知海內皆王土亦喜江南有俊才歸去誠心煩為說春風先到鳳凰臺蓋豕者朱姓決城而入狐者胡人下殿而走天之示人良亦顯矣

明興雜記

貓

猫臥堂限

唐薛季昶為荊州長史夢猫伏臥於堂限上頭向外以問占者張猷猷曰猫者爪牙伏門限者闡外之事君必知軍馬未旬日除貴州都督嶺南招討使

朝野僉載

鼠

鼠入衣下

齊婁太后孕襄城博陵二王夢鼠入衣下

北史

大鼠出入棺中

隴西李彊名妻崔氏甚美方暑月卒已埋彊名痛之不已數日妻見夢曰吾命不合絕然吾形已敗帝命天鼠為吾生肌膚十日後當有大鼠出入棺中然當封閉門戶待七

走獸

七日開吾門出吾身吾卽生矣十餘日忽有白鼠數頭出入棺所因異之試發其棺見妻骨有肉生焉復閉之積四十八日其妻又見夢曰吾明晨當活盍出吾身旣曉彊名發之妻則甦矣扶出浴之美倍於舊居無何復病一日遂亡計其再生纔百日耳或曰有物憑焉

記聞

吞白鼠

釋智顛母徐氏夢吞白鼠如是再三怪而卜之師曰白龍之兆也乃誕育顛

神僧傳

黃鼠狼過江

寶曆士人黃登同數人在吉州神岡山廟祈夢登不寐餘

皆熟睡少頃皆魘皆呼曰打打問之云夢黃鼠狼過江也登乃子生姓又合私自喜是年得第

夢談

夢占類考卷三

夢占類考卷四

長洲張鳳翼伯起編

鱗介部

龍
兩龍挺白圖

黃帝脩德立義天下大治乃召天老而問曰予夢見兩龍
挺白圖以授予於河之都天老曰河出龍圖雒出龜書紀
帝錄列聖人之姓號興謀治太平然後鳳凰處之今鳳凰
已下三百六十日矣天其授帝圖乎黃帝乃祓齋七日至
於翠嬀之川大鱸魚折溜而至乃與天老迎之五色畢具
魚汎白圖蘭葉朱文以授黃帝名曰錄圖

河圖挺佐輔

鱗介

蒼龍據腹

漢虜魏王豹薄姬輸織室詔納後宮歲餘不得幸始姬少時與管夫人趙子兒相愛約曰先貴無相忘已而管夫人趙子兒先幸漢王坐河南宮成臯臺此兩美人相與笑薄姬初時約漢王聞之問其故兩人具以實告漢王心慘然憐薄姬是日召而幸之薄姬曰昨夜妾夢蒼龍據腹王曰此貴徵也吾為汝遂成之一幸生男是為代王其後薄姬從子之代而為代王太后代王立十七年高后崩大臣迎立之是為文帝

漢書

乘赤龍上天

光武曰我昨夜夢乘赤龍上天覺悟心中動悸馮異因下席再拜賀曰此天命發於精神心中動悸大王重慎之性也異遂與諸將定議上尊號

後漢書

龍頭授已

孫權潘夫人父為吏坐法死夫人輸織室權見而異之召充後宮得幸有娠夢有以龍頭授已以蔽膝受之遂生孫亮

吳志

龍不見尾

孫休夢乘龍上天回顧不見尾覺而異之後太子不得立休遂為帝至孫皓繼之吳以亡

吳志

兩龍抗膝

孝武太后李氏以微賤入為會稽王宮人夢兩龍抗膝入懷太祖異而召之生烈宗

晉中興書

兩龍枕膝

簡文帝欲採納諸姬以隆奕世之緒令善相者召諸愛妾示之皆云非其人又悉以諸婢媵示焉時李太后為宮人在織坊中形長而色黑宮人皆謂之崑崙既至相者驚云此其人也帝以大計召之侍寢後數夢兩龍枕膝日月入懷意以為吉祥向儕類說之帝聞而異焉竟生武帝

晉書

龍據屋

齊世祖蕭蹟以宋元嘉二十七年六月己未生於建康將產之夕二母並夢龍據屋故小字為龍兒

南史

捉龍脚

宋明帝遣前淮南太守孫奉伯往淮南奉伯舊與蕭道成款是行也道成與奉伯同室臥奉伯夢道成乘龍上天於下捉龍脚不得及覺叙夢因謂兗州當大庇生靈而弟不得與也時道成為兗州故云及道成登帝位奉伯已先卒

南史

龍罩體

梁阮修容有娠夢龍罩其體後生元帝

梁書

化龍通夢

梁郗后酷妬忌及終化為龍入於後宮通夢於帝或見形
光彩照耀帝體將不安龍輒激水騰涌於露井上至殿衣
服委積常置銀轆轤金瓶灌百味以祀之故帝卒不置后
青龍出懷

陶弘景母有娠夢青龍出懷是生弘景及長聰識博達因
讀神仙傳有乘雲馭龍之志

梁書

乘龍上天

祖珽謂長廣王言殿下有非常骨法孝徵夢殿下乘龍上
天王謂曰若然當使兄大富貴及即位是為武成皇帝擢

拜珽為中書侍郎孝徵珽字也

北史

斷龍大龍蠕龍浴龍

齊婁太后孕文襄夢一斷龍孕文宣夢大龍首尾屬天地
張口動目勢狀驚人孕孝昭夢蠕龍於地孕武成夢龍浴
於海

北史

龍飛西南

石季龍夢龍飛西南自天而落旦而問佛圖澄澄曰禍將
至矣宜父子慈和慎之慎之季龍引澄入東閣與其后杜
氏訊之澄曰脇下有賊不出十日自浮圖以西此殿以東
當有血流慎勿東也杜后曰和尚耄耶何處有賊澄即易

語云六情所受皆悉是賊老自應羞但使少者不昏即好耳遂便寓言不復彰明後二日宣果遣人害韜於佛寺中欲因季龍臨喪殺之季龍以澄先誠故獲免

北史

龍飛墮地

隋煬帝生時獨孤后夢龍出身中飛高十餘里墮地尾斷以告文帝文帝默然

隋書

化爲千數小龍

釋澄觀常思付授忽夜夢身化爲龍矯首於南臺蟠尾於山北擎攫碧落鱗鬣耀日須臾蜿蜒化爲千數小龍騰躍青冥分散而去蓋取象乎教法支分流布也遂於中條山

棲巖寺住寺有禪客拳眉剪髮字曰癡人被短褐操長策狂歌雜語凡所指斥皆多應驗觀未至之前狂僧驅衆僧洒掃曰不久菩薩來此以元和年中示滅

神僧傳

四龍入心眼

釋世瑜於貞觀元年夢四龍來入心眼既覺大悟三論宗

旨

神僧傳

乘龍升天

唐宣宗初封光王嘗夢乘龍升天言之於鄭后曰此不宜人知者幸勿言歷太和會昌間愈事韜晦及武宗崩遂以皇太叔嗣大位

唐書

鱗介

卷之四

皇太后神龍欲出宮

孟蜀母后之宮有衛聖神龍堂嘗修飾嚴潔蓋卽世俗之家堂神也一旦別欲廣其殿宇因晝寢夢一青衣謂后曰今神龍意欲出宮外居止宜于寺觀中安排可也后欲從之而蜀主未許后又夢見青衣重請因選昭覺寺廊廡間特建一廟土木就緒遂宣教坊樂自宮中引出歸新廟中奏迎神曲其日玄雲四合大風振起及神歸位雨卽滂沱或曰衛聖神龍出離宮殿是不祥也逾年國亡

野人間話

宋太祖微時客遊漢東依漢隨州刺史董宗本宗本子遵

誨夢黑蛇長百尺餘化龍東北去雷電隨之以語太祖及太祖卽位召見遵誨曰卿尚記化龍之夢乎

宋史

黑龍蟠樹上

謝深甫過父友對飲留宿夜半酒渴無從得水牕前梨熟深甫遂登樹啖之爲犬所吠不得下主人夢黑龍蟠樹上啓戶視之則深甫也遂以女妻之深甫果至宰相

夢譚

兩龍盤旋

宋鄒應龍初名某未試前乞夢於大乾廣祐王廟夢室內兩龍盤旋已騰上一龍之背越前而出旣覺遂更名次年省闈莫子純首冠鄒居第二因親策士以子純有官不

可以為首乃依故事升鄒為大魁

龍降其家

文天祥母將誕夢有龍降其家遂生天祥狀元錄

龍蛻爪於門外石

有一客店主夢龍蛻爪於門外石迨曉見文天祥脫履於

石少憇而去文山集

白龍翁來

鄭獬嘗病傷寒夢身化為龍浴於大洪山池中池上人呼

曰白龍翁來蓋此處有白龍黑龍二池之名故也獬後得及第

黑白二龍

高皇夜夢內殿左右楹柱有黑白二龍繞之而鬪左黑者

勝明日偶見太孫與燕邸各抱一柱而嬉燕邸在左

焉明興雜記

白龍入室

陳檢討獻章生前一夕母夢白龍入室其光如晝迨後獻

章中正統丁卯鄉試以特薦授翰林檢討為本朝名儒

兩龍下攫其中

吳文定寬會試前夢過國學適陰雲四合大雷電欲雨龍

下攫其中併其身而上遂驚寤無何狀元及第近峰聞略

乘龍而墜

詳幃服部趙孝成王

二白龍夾舫

詳地理部劉穆之

負白龍升天

詳成器部趙汝愚

乘龍上天至屋而止

詳棟宇部郭瑀

魚 衆維魚矣

牧人乃夢衆維魚矣

衆謂人也人如魚之多也

旄維旗矣

旄郊野所建統人少旗州

里所建統人多謂旄所統如旄所統之多也

大人占之衆維魚矣實維豐年旄

維旗矣室家溱溱

詩經無羊之卒章言衆維魚則為豐年之應旄維旗則為多盛之象也

魚求去鈎

漢原人釣魚於昆明池綸絕而去武帝夢魚求去其鈎明

日帝戲於池見大魚啣索帝曰豈非昨所夢乎取魚去其

鈎而放之

辛氏三秦記

魚變為人

左賢王劉豹妻呼延氏祈子於龍門俄而見一大魚頂有

二角軒鬣躍鱗而至祭所久之乃去其夜夢此魚變而為

人左手把一物大如半雞子光景非常授呼延氏曰此是

日精服之生貴子寤而告豹豹曰吉祥也自是十三月而生子左手有文曰淵遂以名焉至晉永興初稱帝都平陽

北史

大魚食蒲

秦主苻生夢大魚食蒲又長安謠曰東海大魚化為龍問在何所洛城東蒲苻氏故姓也東海苻堅所封也堅時為龍驤將軍其第在洛陽之東此堅將王秦之徵也苻生不知是堅以謠夢之故殺其侍中魚遵

北史按大魚之云似於堅無當應是鮮卑

慕容氏之兆

魚齧嬰兒

唐河東柳沂僑居洛陽因乘春釣伊水得巨魚挈歸置盆水中先是沂有嬰兒始六七歲是夕沂夢魚以喙齧嬰兒臆沂驚寤兒亦自言夢大魚齧臆痛不可忍而啼沂視兒臆果有瘡血沂懼明旦以魚投伊水中旬餘兒瘡愈沂自後不復釣

宣室志

大魚躍盆水中

宋胡安國弟生子寅母以多男不欲舉安國妻夢大魚躍盆水中急取而子之寅少桀黠難制父閉之空閣上有雜木寅盡刻為人形安國曰當有以移其心別置書數千卷於上年餘寅悉成誦後游辟雍中進士甲科又以薦除秘

書省校書郎多所建白竟為名臣云

身為魚

越州有盧冊者在山陰縣顧樹村與表兄韓確同居確自幼嗜鱸嘗憑吏求之方寐夢身為魚在潭有相忘之樂見二漁人乘艇張網不覺身入網被取擲桶中覆之以葦復覩所憑吏就商價吏即揭鰓貫綆楚痛不可言及至舍歷認妻子奴僕有頃寘砭刀若脫膚首落方覺神癡良久冊驚問之確具述所夢冊遽呼吏訪所市魚處洎漁子形狀與夢不異遂買魚放之確後從釋住祇園寺

酉陽雜俎

群魚來謝

陳倣吳江縣吏也平生廣行陰德但未能斷食魚嘗於池中養魚以待烹啜方欲斫膾待賓忽聞池中似人言乞命於是盡放其魚於江是夜夢群魚來謝曰玉帝知君放我等萬命已令天曹掛名仙籍三年後果於長橋白日上昇

姑蘇志

魚膏雜油中

廬山賣油者養其母甚孝為暴雷震死其母自以無罪日號泣于九天使者之祠願知其故一夕夢朱衣人告曰汝子恒以魚膏雜油中以圖厚利凡齋醮用此油則腥氣熏烝神靈不降震死宜矣母遂不復號泣

稽神錄

魚化為鳥

詳說夢部蕭方等

群羊負魚

詳走獸部石季龍

蛇
天使殺蛇

晉文公出有大蛇如拱當道文公乃修德使吏守蛇守蛇
吏夢天使殺蛇謂曰蛇何故當聖君道覺而視之蛇則臭
矣博物志

蛇自天屬地

秦文公東獵汧渭之間卜居之而吉文公夢蛇自天下屬

地其口止於郿衍文公問史敦敦曰此上帝之徵君其祠

之於是作郿時用三牲祭白帝焉漢興高祖初起殺大蛇

有物曰蛇者白帝子而殺者赤帝子也前漢書其略見史記封禪書

蛇生四足

東平劉楨夢蛇生四足穴居門中使周宣占之宣曰此為
國夢非君家之事也當殺女子而作賊者頃之女賊鄭姜
遂俱夷討以蛇女子之祥足非蛇之所宜有故也魏志

蛇繞身

唐琮夢蛇繞身遂効其形作草蛇之書王隱晉書

大蛇繞身

李雄母羅氏因汲水忽然如寐夢大蛇繞身遂有孕十四月而生雄後竟有蜀土

蜀志

令蛇纏身

唐武德間江陵人方昌殺一大蛇一夕方昌死夢告其妻曰我在生殺一蛇今被訴於閻摩天子追我魂至冥司令蛇纏身噬齧苦痛難忍須為我請僧寫金剛經七卷懺悔救厄妻覺鬻五歲子與蜀客得錢寫經已而憶子目盲但每日誦經求乞後蜀客死子得其貲歸江陵追念母初至未及尋因遇節臘祀祖廣設齋事丐者盈門數中一瞽嫗口誦金剛經自言鬻子薦夫事細問之即其母也母子遂

復合悲喜異常母目尋亦愈

報應記

蛇自臍入腹

范延光嘗夢大蛇自臍入腹半入而掣去之以問術士張生張生曰蛇龍類也龍入腹中王者之兆自是延光頗蓄異志在唐事明宗及末帝俱為樞密節度使復降晉高祖以見疑不能容為楊光遠所讎推墮水溺死

五代史按半入掣去豈得

為祥

以罪為蛇

無錫張氏女死其母夢女曰我以罪為蛇既覺得蛇於棺下以告高僧宗本本為說法復置故處俄有黑蟬翔棺上

鱗介

蛇失所在母祝曰若我女當入籠中蟬如其祝本復為說
法是夕母夢女曰二報已解脫矣無錫志

維虺維蛇

詳走獸部詩云維虺維蛇女子之祥

蛟
懷蛟

董仲舒夢蛟入懷遂作春秋繁露

龜
龜殞秦庭

秦主苻堅初年高陸人穿井得龜大三尺背有八卦文堅
命太卜池養之食以粟及太元末年龜死藏其殼於太廟
其夜廟丞高虜夢龜謂之曰我本出將歸江南遭時不遇

殞命秦庭又夢人謂虜曰龜三千六百歲而終終必妖興
亡國之徵也北史

龜獻奇方

有一人患傷折醫云宜用生龜尋捕一龜將殺之一夕忽
夢龜告曰勿相害吾有奇方可療但用生地黃一斤生薑
四兩炒令均熟以布袋罨傷折處即愈矣既寤試之果効

江畔老龜

紹興五年秋湖口人林四日暮馳馬顛墜折一足骨斷醫
莫能治偶一道人過門聞號哭聲而問其故入視之曰續
筋接骨非龜板不可茲去五里許江畔一大龜身闊二尺

捕而脫其殼燒灰傳損處賢於小者百數也時已昏暮未暇遣捕半夜後鄰家張翁夢烏衣人來訪自稱為江畔老龜哀投甚切云林四折足醫欲殺吾取殼以療傷望為救護張謝曰老夫愚鈍如何施力烏衣云只煩丈人詣林氏諭衆醫曰往日曾有龜傳一方於人而續命者用淹藏瓜糟罨斷處次將杉板夾縛如定更增赤小豆拌入糟中尤妙願丈為告之異日當圖報遂去黎明張如所戒林與醫皆喜而從之應期而驗類編

大龜以身嚴佛像

嘉定中譚思通初菴名崇壽鑿井得木佛金粉雖褪模刻

宛然因大拓規模名靜信寺像設未備忽一夕夢大龜云願以身嚴佛像翌日見一大龜引六龜乘潮至浮于岬浦之上思通嘆曰吾安忍害物命以營繕乎遂縱于海未幾崇明州施光遠者亦感是夢遂取殺之得玳瑁鬚錢詣譚氏以成佛像光遠者思通之姻也二人會次言之若合符節今寺勒石以記姑蘇志

龜

大龜啣足

宗伯瞿公景淳以會元榜眼官內翰主應天鄉試時大學士王公錫爵魁春秋迨瞿丁內艱歸過王宿焉夢大龜啣其足詰朝向王公述之曰此吾子春闈首舉之兆也後春

榜科名果躡瞿之跡焉

狀元錄

三箭插龜上

詳成器部王文恪

昆蟲部

蝶 蝴蝶栩栩

昔者莊周夢為蝴蝶栩栩然蝴蝶也自喻適志與不知周也俄然覺則蘧蘧周也不知周之夢為蝴蝶與蝴蝶之夢為周與周與蝴蝶則必有分矣此之謂物化

齊物論

蟲 飛蟲無數

明德馬皇后選入太子宫時年十三禮則修備上下安之

遂見寵異顯宗即位以后為貴人時賈氏亦以選入生肅宗帝令后母之后於是盡心撫育勞悴過於所生后常以皇嗣未廣每懷憂歎薦達左右若恐不及忽夢有小飛蟲無數赴着身又入皮膚中而後出居數日有司奏立長秋宮帝未有所言皇太后曰馬貴人德冠後宮即其人也遂立為皇后

後漢書

蠅 青蠅矢

昌邑王賀就徵既即位夢青蠅之矢積西階東可五六石以屋版瓦覆問郎中令龔遂遂曰詩不云乎營營青蠅止於藩豈弟君子毋信讒言陛下在側讒人衆多如是青蠅

昆蟲

惡矣惡即矢也宜進先帝大臣子孫親近以為左右如不忍昌
邑故人信用讒諛必有凶咎願詭禍為福皆放逐之臣當
先逐矣賀不用其言卒至於廢前漢書

青蠅在鼻上

詳人身部何晏

蟻

蟻穴兩腋

黃庭堅初見清老清云學士前身是一女子我不詳語後
日至涪陵當有告者黃既坐黨人遷涪夢一女子語之曰
我生前誦法華經志願後身為男得大智慧為時名人今
學士其後身也學士年來所患腋氣緣我棺朽蟻穴兩腋

故有此苦此後山即我墓學士能啓之為除其蟻則腋氣
除矣既覺訪視啓墓如言除戢腋病遂平春渚錄

蟻中之王

富陽縣董昭之乘船過錢塘江江中見一蟻著一短葦暹
遽畏死因以繩繫葦著船船至岸蟻得活其夜夢一烏衣
人謝云僕是蟻中之王也感君見濟之恩後有急難當相
告語歷十餘年時所在劫盜昭之被橫錄為劫主繫餘姚
昭之因思前夢取三兩蟻著掌中語之夜果夢烏衣云可
急投餘杭山既寤蟻齧械已盡因得出獄入餘杭山旋遇
赦得白云齊諧記

蝦蟆 生菜蝦蟆毒

詳醫藥部丘傑

蠶 十一月養蠶

給事中陳安平子年滿赴選與鄉人李仙藥臥夜夢十一

月養蠶李仙藥占曰十一月養蠶冬絲也君必得冬司數

日果授工部 朝野僉載

蝟 大蝟破鄴城

北齊河清末武成帝高湛夢大蝟攻破鄴城故索境內蝟

膏以絕之不知後主名緯聲音與蝟相協乃亡齊之徵也

蛆 牀下群蛆

唐高祖舉兵夢身死墜牀下為群蛆所食智滿禪師曰公
得天下矣牀下者陛下也群蛆食者億兆共仰一人活也
神異錄

品物部

五穀 極上有三穗禾

蔡茂初在廣漢夢坐大殿極上有三穗禾茂跳取之得其
中穗輒復失之以問主簿郭賀賀離席慶曰大殿者宮府
之形象也極而有禾人臣之上祿也取中穗是中台之位
也於字禾失為秩雖曰失之乃所以得祿秩也袞職有闕
君其補之旬月而茂徵代戴涉為司徒焉乃辟賀為掾 後

漢書

西籬下有粟

劉殷居貧孝養嘗夜夢人謂之曰西籬下有粟寤而掘之得粟十五鐘銘曰七年粟百石以賜孝子劉殷自是食之七年方盡

小麥漬脚

李禮之與妻鄭氏相重妻先亡遺言終不獨死未幾禮之

脚上發腫夢妻云煮小麥漬之即差既寤如其言反創而

卒

磨麥蓮花落

寧波一婦以兵亂與夫及子相失寄食老尼一夕夢人使磨麥又見蓮花盡落覺而心惡之以語尼尼曰吉祥也問其故尼曰磨麥者將見夫面也蓮花落蓮子得見也無何果得聚首云

禾中走

詳走獸部尼妙寂

滿城出菜

苻堅將欲南伐夢滿城出菜又地東南傾其占曰菜多難為醬也東南傾江左不得乎也

菜與殿齊

品物

真宗臨軒策士夜夢殿下有菜一苗甚盛與殿基相齊及拆第一卷蔡齊上見其狀堂堂曰得人矣詔金吾給衛士七人清道尋詔自今第一人及第令給七人當直許出入則兩對引喝傳呼狀元始為定制

東齊遺事

生菜蝦蟆毒

詳醫藥部立傑

瓜 人與瓜

後魏宋瓊母病冬月思瓜瓊夢見人與瓜覺得之手中時

稱孝感

夢雋

縣縣生之瓜

詳人身部衛侯

蘿蔔火吾宮

齊州有人病狂夢歌曰五靈華蓋曉玲瓏天府由來汝府中惆悵此情言不盡一丸蘿蔔火吾宮又歌曰踏陽春人間二月雨和塵陽春踏盡秋風起腸斷人間白髮人後遇一道士作法治之乃云夢中見一紅裳少女引入宮殿皆紅紫飾小姑令歌道士曰此正犯大麥毒女則心神小姑脾神也按醫經蘿蔔治麩毒故曰火吾宮即以藥并蘿蔔食之遂愈

洞微志

芝蘭 青雲芝

口口物

卷之四

羊悖夢入洞府有一物飛去神人曰此青雲芝也

五色芝產門楣

主待制禕大父為石峽書院山長一夕夢五色芝產門楣翌日生禕識者以為文章之兆公幼秀爽敏慧國初以聘起累官翰林待制有文名奉使諭雲南死節諡忠文

授芝草

尚寶少卿陸公師道夢登高樓遇道士授以芝草明日過高真道院徐道士出芝庭卷求詩恍悟昨夢遂題二十八字昨夢登真度飛閣羽人乞我金光芝高真院裏逢三秀忽悟清霄土雪姿陸符卿集

吞芝

詳名姓部申泰芝

蘭 天使與已蘭

鄭伯蘭卒穆公也初鄭文公有賤妾曰燕姑夢天使與已蘭

曰余為伯儵余而祖也伯儵南燕祖以是為而祖以蘭有國香

人服媚之如是既而文公見之與之蘭而御之辭曰妾不

才幸而有子將不信敢徵蘭乎公曰諾生穆公名之曰蘭

文公報鄭子之妃曰陳媯生子華子臧子臧得罪而出誘

子華而殺之南里使盜殺子臧於陳宋之間又娶於江生

公子仕朝于楚楚人醜之及葉而死又娶於蘇生子瑕子

俞彌俞彌早卒洩駕惡文公亦惡之故不立也公逐群公子公子蘭奔晉從晉文公伐鄭石突曰吾聞姬姑耦其子孫必蕃姑吉人也后稷之元妃也今公子蘭姑甥也天或啓之必將為君其後必蕃先納之可以亢寵與孔將鉏侯宣多納之盟于大宮而立之以與晉平穆公有疾曰蘭死吾其死乎吾所以生也刈蘭而卒左傳

著 卜著一具

著草增一

薨 齊褚彥回少病篤夢人與卜著一具遂差果年四十九而薨

詳什百部孫承祐

松 梓化為松栢棫柞

太姒夢商庭產棘太子發移周庭之梓樹於闕梓化為松栢棫柞覺以告文王召太子發占之吉是受商之大命書

松出腹

丁固初為尚書郎夢松出其腹謂人曰松字十八公十八年吾其公平遂為司徒張勃吳錄

松圍二尺

鍾輻植松夢朱更曰松圍二尺子當及第後果然

松生戶棗生屋

有一人夢松生戶前一人夢棗生屋上以問補闕于董董
言松丘壠間所植棗字重來重來呼魄之義俱非吉祥後
二人俱卒

酉陽雜俎

栢 側栢葵花

光化中劉道濟止天台山夢一女子引入牕下有側栢葵
花無何前至奉化縣古寺見有一牕側栢葵花宛夢中所
見問之寺僧云有一客官女甚美至此中心疾而死蓋道
濟所夢乃此女之魂也

唐史

青栢枝

王九年十三時病甚父抱詣青華觀許為道士後夢一老

人出青栢枝令啗及覺遂不食惟食生果清泉而已太宗
召赴闕賜名趙自然

繁昌志

栢葉仙人來

田鸞長安世家也欲求長生術入華山遇一黃冠指栢樹
示之曰此卽長生藥也但欲食之無間耳鸞歸取栢葉曝
乾為末服之漸覺煩熱至八年無間熱如火遍體潰爛鸞
食之不輟一日覺小可須湯沐浴遂得寢三日方寤諸瘡
掃去膚肉光澤自云初寢夢黃冠數人持節引謁上清見
列仙皆云栢葉仙人來遂授以仙術勒名玉牌金字謂曰
且止人間後當相召復引而歸鸞自此辟穀至百二十三

歲得尸解云 化源記

香鑪峯檉栢

釋智晞創造堂殿悉皆嚴整惟經臺未構始欲僦工衆議經營豈可率爾其香鑪峯檉栢木中清勝可共取之以充供養往諮於晞晞良久曰山神護惜不可造次是夜夢人送疏云香鑪檉栢樹盡皆捨給經臺 神僧傳

松栢不改

詳文翰部蕭燧

梧 前園橫生梧桐

吳王夫差夢前園橫生梧桐公孫聖曰前園橫生梧桐者

梧桐心空不為用器但為盲僮與死人俱葬也詳地理部

梧桐椎

涼王士業將謀東伐有燉煌父老令狐熾夢白頭公衣恰而謂熾曰南風動吹長木梧桐椎不中轂言訖不見桐椎士業小字也師出果為蒙遜所害 史

縣後何家桐甚良

何敬叔少奉佛作一檀像未有木先夢一沙門衲衣杖錫來云縣後何家桐甚良覺後如夢求之果得 真祥記

梓 中庭生梓樹

漢武帝幸平陽公主家幸衛子夫遂納於宮中歲餘不得

見子夫請出上曰吾昨夜夢子夫中庭生梓樹數株豈天
意乎是日幸之有娠生女凡三幸生二女一男男即戾太
子也

漢史

槐 三槐之間

孔子夜夢三槐之間豐沛之祔有赤烟氣駘車對楚西北
觀之見芻兒敵鹿傷其左足薪而覆之

沈約宋書

大槐南柯

唐淳于棼住廣陵東宅有大古槐時飲其下一日病臥夢
二紫衣自言槐安國王使者相邀呼之曰駙馬因娶之以
女且命為南柯太守貴幸用事者若二十年事迨寤身依

然臥日隱西垣矣生驚感出尋槐下一穴知即夢中所經
入處將謂邪祟遂命僕荷斧斤斷握見旁可袤丈有大穴
洞上有積土為城郭樓臺之狀有蟻數斛聚其中其即所
謂槐安國乎直上南枝可三四丈亦有土穴其即所領南
柯郡乎人始悟人世之倏忽亦若此云

枕記然取其足以儆世故錄之

愚意未必實有是夢其說頗類邯鄲

臥槐樹下

詳天象部元順木傍有鬼也

桑 空桑之中

孔子毋徵在遊大冢之陂睡夢黑帝使請於已交語曰女

品物

卷之四

二五三

乳必於空桑之中覺則若感而生孔子

春秋孔演圖

井中生桑

詳棟宇部何祗

楓 楓生腹上

張志和毋夢楓生腹上而產志和

梨 分梨

楊進賢任南陽刺史登舟遇風失其子夫婦想念甚切忽夜夢與兒剖一梨因自解曰剖梨分離也明日迷所夢於友友曰分梨則見子矣不旬日果得其子

柳 柳樹仆地

柳宗元自永州司馬徵至京時意望錄用一日詣卜者告以夢曰余柳姓也昨夢柳樹仆地其不祥乎卜者曰無苦但憂為遠官耳夫生則柳樹死則柳木木者牧也君其牧柳州乎後竟如其言

因話錄

櫟 匠石歸櫟見夢

匠石之齊至乎曲轅見櫟社樹其大蔽牛絜之百圍其高臨山十仞而後有枝其可以為舟者旁十數觀者如市匠石不顧遂行不輟弟子厭觀之走及匠石曰自吾執斧斤以隨夫子未嘗見材如此其美也先生不肯視行不輟何耶曰已矣勿言之矣散木也以為舟則沉以為棺槨則速

腐以為器則速毀以為門戶則液滿以為樹則蠹是不材之木也無所可用故能若是以壽匠石歸櫟見夢曰汝將惡乎比予哉若將比予於文木耶夫相梨橘柚果蓏之屬實熟則剥則辱大枝折小枝泄此其以能苦其生者也故不終其天年而中道夭自培擊於世俗者也物莫不若是且余求無所用久矣幾死今乃得之為余大用使余而有用且得有此大也耶且也若與予皆物也柰何哉其相物也而幾死之散人又烏知散木匠石覺而診其夢弟子曰趣取無用則為社何耶曰密若無言彼亦直寄焉以為不知已者詬厲也不為社者且幾有翦乎且也彼其所保與

眾異而不以義譽之不亦遠乎莊子

棘 青棘香

終南長老入定夢天帝賜以青棘之香釋典

商庭產棘

詳本部周太姒商將亡之兆也今其東大國蓋木斬為崇

木 神告勿伐大樹

臨海廨舍有大樹尉王淮欲伐之紹興郡守蕭振夢神告以伐樹故且云尉他日當作相及淮至郡謁振振勸勿伐樹淮愕然詢何從知振曰第勿伐足矣不必深究淮從之後果為相

品物

大木

景寧縣南有山將建廟其上其下有人夢山神以大木來獻明日果得木因名其山為勅木山

處州志

木神為崇

厲泉民吳偃家於田野間有一女十歲餘一夕莫知所往後數日偃夢其父謂偃曰汝女今在東北隅蓋木神為崇偃驚而寤至明日即於東北隅窮其跡果聞有人聲偃視之見其女在一穴內口甚小其中稍寬厥傍有古槐木盤根極大於是伐其樹挈女歸

宣室志

眾異庭下竈居樹上

詳地理部霍顯

竹 竹山神來顯瑞鳳

唐玄宗夢一人紫服自稱竹山神來獻瑞鳳翌日果有鳳翔遂名其山為紫籜山

台州志

竹一束

葉祖洽赴省試夢惠應王指殿下竹一束示之前此廷對惟以賦及祖洽入試始用策蓋竹一束策字也其年葉遂得大魁

八閩志

竹一株

河陰尉王君炳三子入試學院王夜夢老嫗持竹一株贈

口品物

卷之四

三五

之王令種之士阜上既寤向人說之有坐客云二郎君俱
中選矣竹字兩個也未幾人來報俱有名

果櫻桃青衣

唐天寶初范陽盧子應舉屢不第一日偶乘驢行見一精
舍中有僧開講盧方詣講筵倦寢夢一青衣携一籃櫻桃
在下坐盧訪其家因得遇從姑與連姻得第拜官經三十
年既而夢覺服飾如故徐出門則小豎捉驢相待盧訪其
時日方向午盧乃惘然知人世榮華亦如此此後遂不復
求宦達尋仙訪道絕跡人世云

此夢與邯鄲枕大略相似

牡丹孔雀銜牡丹蕊

賈雲華為賈平章女其母邢國夫人莫氏夢孔雀銜牡丹
蕊寘於懷中而生生而聰慧姿色絕人後嫁為魏鵬妻卽
所傳還魂事云

黃牡丹

弘治庚戌汪學士諧為主考王文恪為同考一夕汪夢人
餽黃牡丹二本以問王王未有以對放榜則錢福第一已
乃問楊學士廷和楊曰此必福之兆也不聞洛陽相君忠
孝家可憐亦進姚黃花為錢惟演故事乎斯人也高科兆
矣而非端士是科會試殿試福皆第一而不克終

蓮

紺蓮花

品物

馮元七歲時讀易其母夜夢異人以紺蓮花與元吞之且曰善讀此後必貴顯元果登進士第歷官至戶部侍郎迨老率三日一誦易云

宋史

登蓮花上

中允陳公謹嘗夢蓮花二朵甚大自空中而墜於庭有仙童女隨蓮花而下似左金童右玉女左謂公曰何不登蓮花之上公如其言蓮花冉冉而升漸入雲端心甚恐俄有神人持金冠緋袍隨與服之皆與夫人偕豈非聯科大擢之兆乎

見狀元錄予公門下士也公嘗謂予初無此夢不知纂是錄者何所本予恐是他狀元夢此而纂者誤以為陳公故錄之以俟參考

桂

移桂歸植

顧文康鼎臣之父嘗夢入進士鄭文康家移其桂歸植之已而子以狀元宰相謚文康與鄭名同蓋懸七十年而夢始應云

梅

梅花詩

于肅愍謙嘗於景泰四年正月十九日夢中作梅花詩云水邊籬下兩三枝冷艷寒香祗自知看盡春風齊結子調羹還有倩人時

肅愍集

梅花落英

隆慶改元長至後三日既望之夕仲氏獻翼一更後有弄

瓦之喜夢梅花萬樹落英蔽空似雪非雪心惡之書於書尾所生女秀而慧不幸天亡後五年子生蓋梅花落女不延且將結子也

梅花繁盛

詳飲食部唐大史

桃

桃花洞中

嘉靖乙酉秋李萊州建夢桃花洞中一少年得雋已而李

中允學詩中試善公結廬讀書處則桃花洞之麓也已而

聯捷自郡理陟吏部改內翰云

荆川文集

花

小山花木

宋沈括嘗夢至一小山花如覆錦喬木蒼鬱山下有水甚樂之後謫居潤州覓得此山宛如夢中遂築室居焉因以夢名溪林希詩夢溪謫仙人松菊繞新宅

鎮江志

隔花泣窺井笑

唐暄娶姑少女張氏留之衛南莊暄以事入洛累月不得歸夜夢妻隔花泣俄而窺井笑及寤心惡之明日就日者卜之曰隔花泣者顏隨風謝也窺井笑者喜向泉路也居數日果有凶信

僧遺以花

胡尚書湊母李氏有娠夢僧以花遺之是生湊無何有僧

來索觀淡見僧卽笑僧曰此吾師後身也命我求見以笑
為驗今果然聞者異之淡生而白眉彌月乃黑洪武中登
進士第官給事中後歷官至尚書進少傅立朝幾六十年
歷事六主十知貢舉國家大政多所參定為一時名臣云
花卉數十本

田不欲僉憲湖廣時以檄大木事過夷陵將禮黃陵廟神
先夕夢神以晉時花卉數十本餽之老幹脩枝鮮古可愛
覺而奇之翌日抵廟下禮成西詣一小禪院問禪於老衲
衲以三十二家金剛經篆文進因思與夜夢符推席大喜
翌日携書舟行然又嫌於釋難廣傳也遂搆小思叶旁音

感事成詩以備三十二家之體

古篆後序

月中有花

詳天象部月曾不花

蕉
蕉鹿

詳走獸部鄭人

草
拔馬蘭草

爾朱兆將入洛高歡為晉州刺史遣長史孫騰詣兆兆曰
可白高家兄弟吾有吉夢今行必克吾夢亡父登一高堆
堆傍地悉耕熟惟有馬蘭草株往往猶在吾父顧我令下
拔之吾手所至無不盡拔以此言之往必有利騰還具報

之已而兆果克京師

北史

掌中草

詳人身部辛寅遜

爾米門東草

詳走獸部尼妙寂

蒲 大魚食蒲

詳鱗介部苻生

飲食部

食瓜甚美

漢明帝陰貴人夢食瓜甚美帝使求諸方國時燉煌獻異

瓜種名穹窿長三尺而形屈曲味美如飴符所夢云

兩甌麻粥

齊宣孝陳皇后生高帝帝二歲時乳人乏乳后夢人以兩

甌麻粥與之覺而有乳

同饗醲

華僑頗通鬼神常夢同共饗醲醒則醉吐狼籍

陶弘景語

李靖李勣求食

安祿山擊契丹還奏臣夢李靖李勣向臣求食上乃命祠

之北郡

何得妄食軍糧

飲食

卷之四

三十一

鄴城王叟家積粟至萬斛而夫妻儉嗇常食陳物纔以充腸莊宅尤廣客二百戶叟嘗巡行客坊見一客方食盤餐頗盛叟問汝有幾財而衣食過豐也客云惟有本五千逐日食利但存其本不望有餘故衣食恒足耳叟大悟歸語其妻發倉庫市珍好恣其食味不數日夫妻俱夢為人所錄云何得妄食軍糧覺後儉嗇如初及官軍圍安慶緒於相州盡發其廩以供焉

原化記

勿食蒜韭及犬

陳光道過洞庭夢彩衣童自言是洞中龍子奉命告君勿食蒜韭及犬後三年當有所遇及期六月在河中幕府奉

檄如商州道經藍田宿驛中夢向所見童執節而來曰仙子候君遂導行至一峭壁以節扣洞戶而入此處清涼不似三伏得見仙女自言姓蔡小字次心因請陳作詩飲歎終宵不及於亂陳自作文紀其事

勿進殘食

宋高宗為康王時宣仁太后時以殘食食之一夕夢神人戒令勿與殘食后驚寤

瑞應編

天倉

咸通中薛逢為綿州刺史夢入洞府殺饌甚多而不覩人物有人謂曰此天倉也及寤言之於人州界昌明縣有天

倉洞洞中有自然飲食雲水者往往得而食之即使道士
孫靈諷與親吏往訪果得洞如所夢云感遇錄

身在宴處

王播少貧賤居揚州無人知識唯一軍將常接引杜僕射
亞在淮南端午日盛為競渡之戲諸州徵伎樂兩縣爭勝
負絲棚照耀江水數十年未有也凡揚州之客盡得預焉
唯王不得見招惆悵自責軍將曰某有棚子弟悉在八郎
但於棚內看却勝居盤筵間也王曰唯遂往棚軍將令送
法酒一榼王方憤懣自酌遂就枕即夢身在宴處居杜之
坐判官在下多於杜公近半良久驚覺亦不敢言於人後

為宰相將除淮南兼鹽鐵使當時夢中判官數多一半即
兼并鹽鐵從事也後至五月上旬臨江宴會賓介皆在乃
思昔夢風景氣候無不皆同逸史

此家不食牛肉

陳敏功居吳門比鄰有人夢神人披髮持刀部集數十鬼
物每經民居即呼其人出各分飲一杯至功家則曰此家
不食牛肉已二十年當免其疫時吳門比屋大疫獨陳舉
家無恙談選

不食別供

釋慧思辭親入道數夢神僧勸令齋戒惟一食不食別供

撤饌

魏重修應天甲午鄉試夢柱上懸撤饌二字初不解及中式赴鹿鳴至遲宴已撤矣客座新聞

勿食馬肉

詳舟車部陳楊王

噉生菜遇蝦蟆毒

詳醫藥部丘傑

食茄味美

詳棟宇部大司成

飲

與杖飲以藥酒

樂安太守楊沛夢人曰八月一日曹公當至必與君杖飲以藥酒使周宣占之是時黃巾賊起宣對曰夫杖起弱者藥治人病八月一日賊必除滅至期賊果破魏志

渴

何諷飲困沉寢夢渴作夢渴賦

唐文粹按是夢足為渴者夢飲之驗

不得茶

奚陟少年夢夏日與朝客二十餘人就一廳中喫茶陟東行首坐茶起西自南而行不得至奚渴甚不堪忍俄有一吏走入肥大抱簿書近千餘紙以案致筆硯請押陟方熱

又渴兼惡其肥忿之乘高推其案曰且將去濃墨滿硯正
中文書之上并吏人之面手足衣服無不沾汚乃驚覺夜
索紙筆細錄藏于巾笥後十五年為吏部侍郎時人以茶
為上味日事修潔陟性素奢先為茶品一副餘公卿家未
有也風爐越甌盃托角匙甚佳時已熱因請同舍郎就廳
茶會陟為主人東面首坐坐者二十餘人甌緩行又少揖
客自西面始禱以笑語其茶益遲陟先有瘡疾加之熱乏
茶不可得燥悶頗極逡巡有一吏肥黑抱文簿兼筆硯瀝
汗請押陟燥忿不能堪乃推去并案皆倒正中吏面及簿
書盡汚坐客大笑陟方悟昔年之夢語於同省取所記事

驗之更無分毫差焉逸史

聽經人不得飲

宋吳中有朱進士者聽佛印禪師講金剛經而悅之次日
夢一鬼押五人朱亦同行約二里許入一門挂青布簾鬼
揭簾俱入至廚見竈上桶內有湯五人皆飲之朱亦欲飲
鬼喝云聽經人不得飲遂驚覺明日覓得其家扣門入問
主人廚下有何動靜主言廚下方產六犬死其一朱乃驚
悟

舉杯相向

元陳旅以文藝受知虞集一日集夢旅舉杯相向日旅甚

思公亦知公之不忘旅也但不得見耳既而聞旅卒時旅
在湘江集已歸臨川去蓋千里云

酌以太清神明之醴

鐵龍道人臥石牀移二更月微明及紙帳梅影亦及半牕
鶴孤立不鳴命小童汲白蓮泉燃檜相竹授以凌霄芽
為飲供道人乃游心太虛雍雍涼涼若鴻蒙若皇芒會天
地之未生適陰陽之若亡恍兮不知入夢遂坐清真銀暉
之堂堂上香雲簾拂地中著紫桂榻綠瑤几看太初易一
集集內悉星斗文煥燁燭金流玉錯莫別文畫若煙雲
日月交麗乎中天歛玉露涼月冷如冰入齒者易刻因作

太虛吟吟曰道無形兮兆無聲妙無心兮一以貞百象斯
融兮太一以清歌已光飈起林末激華氛郁郁霏霏絢爛
淫艷迺有扈綠衣若仙子者從容來謁云名淡香小字綠
花乃捧太玄杯酌太清神明之醴以壽予侑以詞曰心不
行神不行無而為萬化清壽畢紆徐而退復令小玉環侍
筆牘遂書歌遺之曰道可受兮不可傳天無形兮四時以
言妙乎天兮天天之先天天之先復何仙移間白雲微消
綠衣化烟月反明予內予亦悟矣遂寘神合玄目光尚隱
隱於梅花間小芸呼曰凌霄芽熟矣

鐵崖文集河南褚與
跋語謂鐵崖先生作

煮茶夢有黃

梁仙人之意

明歲雞水酌

戊申之歲唐太史汝楫夢一梅樹生於庭前花娟靚繁盛
字隱隱見於辨中曰明歲相逢雞水酌明年為巳酉唐果

中式云

狀元錄

天

天天之夫身何山終問曰雲

華

何受令不可對天無法令四神以

亦

亦書畢孫然而與令小玉

亦

亦以壽子所以隨曰以不

亦

亦云各來隨云各來香小

亦

亦未幾華景林海雲

夢占類考卷四

亦令兆無體以無少令以負百象

程